

**ENTREVISTAMOS HOXE A XAVIER VIÑA, XERENTE DO GRUPO ARGOAT SITUADO EN PAZO DE GALEGOS, NO CONCELLO DE FRADES, E QUE ESTÁN ESPECIALIZADOS NA PRODUCCIÓN DE PLANTA DE FRONDOSAS CADUCIFÓLIAS. XAVIER VIÑA TAMÉN OCUPA NA ACTUALIDADE A PRESIDÉNCIA DA ASOCIACIÓN DE VIVEIRISTAS GALEGOS. É, POR TANTO, A PERSOÁ IDÓNEA PARA ANALISAR OS PROBLEMAS DO SECTOR VIVEIRISTA, E DAS POSIBILIDADES DAS ESPÉCIES CADUCIFÓLIAS COMO UNHA ALTERNATIVA, NON SÓ DESDE O PONTO DE VISTA ECOLÓXICO, SENON TAMÉN PRODUTIVO CON VISTAS A EXTRAER RENDABILIDADE DOS NOSOS MONTES.**

## ENTREVISTA CON XAVIER VIÑA

### XERENTE DO VIVEIRO ARGOAT

Xesús Pereiras/CERNA

**P**rimeiro e antes de nada, podesnos explicar un pouco cal é a vosa especificidade empresarial dentro do sector florestal?

Nós, como grupo empresarial, somos o seguinte: Argoat que é a cabeza do grupo produce planta, produce semente, e traballa no tema dos inxertados. Argoat significa terra de bosques, na mitoloxía celta tiñan duas denominacións para chamar-lle a terra, unha argoat (terra de bosques) e outra armor (terra de mar); a idea de argoat é a do bosque e está especializado en frondosa caducifólia. A partir de Argoat, crea-se Boibel Forestal, que é empresa de enxeñería e de servizos florestais (proxectos, execución de obras, reforestacións, tratamientos fitosanitarios, podas, todo o relacionado coa xestión do patrimonio florestal...). Boibel chama-se así porque no oráculo céltico a tribu dos Boibel foi a que transformou o territorio e formou o bosque, Boibel está, por tanto, relacionado coa capacidade transformadora.

**Como xerente dun viveiro privado, cal é a importancia, neste momento, dos viveiros privados con relación aos públicos? e que papel crés ti que deben xogar cada un deles?**

Ben, despois das grandes forestacións da década do 50, feitas polo Estado, o que se chamaba "a forestal", onde había viveiros a pé de repovoación, viveiros voantes, fundamentalmente con planta á raíz núa e de coníferas, pasou-se a finais dos 80 a abrir-se ao mercado privado. Hai que entender que os viveiros forestais forman parte da economía política, entendendo por isto todo aqueles sectores que non sendo rentábeis no libre mer-



cado, son desde un punto de vista de necesidade social. A sociedade necesita que se produza planta para repovar e para conservar e mellorar os códigos xenéticos das especies forestais, entón ten duas posibilidades que se faga pola administración pública con perdas ou que se faga por viveiros privados con axudas públicas aos investimentos, que se tería que entender que sempre son inferiores ás perdas que ó Estado lle costaría levar a cabo a iniciativa. Así os viveiros están a recibir axudas via CEE/Ministerio/Xunta e poñendo-se a producir planta, desenvolvendo-se nos últimos anos a iniciativa privada neste sector.

**Entón desde o teu punto de vista aos viveiros públicos queda-lles algún papel?**

Nestes momentos, queda-lles a inérzia, seguen a producir a raíz núa, todo o que é producción en contedor realiza-a o sector privado, todo o que son especies como o eucalipto só o produce a iniciativa privada. Eles están a

producir só piñeiro (radiata, silvestris e pinaster), castiñeiro híbrido, e algo (moi pouco) de carballo americano e nogreira así como algunas árbores de nadal. Nos entendemos que isto ten que ir desaparecendo e así o reconhecen a maioria das administracións, ainda que tamén nestes anos encontramos casos de empresas públicas (100% capital estatal) que incrementaron moito a sua capacidade de producción.

Nós creemos que os viveiros públicos poderían ter un papel importante a nivel científico, coordinados con centros de investigación, en temas como a mellora xenética etc.... Crés que isto se podería facer desde a iniciativa privada?

En calquier sistema de producción hai duas partes, unha corresponde á ciencia e outra á tecnoloxía. A ciencia precisa planificación, grandes presupostos e visión a longo prazo, e a tecnoloxía compra-se e é un problema de xestión. A ciencia non pode neste momento estar na iniciativa privada, polos grandes investimentos e a visión a longo prazo, salvo no caso das multinacionais. Mas este sector non da para multinacionais, somos empresas pequenas e medianas e mesmo empresas familiares, entón o que si pode realizar é a tecnoloxía. O sector dos viveiros incorporou mais tecnoloxía e mais facultativos nos últimos 6 anos que nos 20 anteriores: todo o que é producción en cepellon, replicados a raíz núa, estaquillados, etc...

Agora ben outras cuestións son más difíciles desde o sector privado, por exemplo para realizar un horto semilleiro que produza semente seleccionada, require-se espazos de 10-15 anos polo menos, desde que inicias as xes-

tions, recollida de material, inxertas e demais, precisas homologacions, etc... Polo que é difícil desde o sector privado. Pero este vai ser unha das maiores demandas o material seleccionado.

**Con relación a isto, ADEGA ven denunciando desde fai moitos anos, a escasez de planta autóctone, concretamente de castiñeiro onde era mui inferior á oferta que a demanda. Sabes como está hoxe o panorama?**

*Na única planta na que os viveiros privados non somos capaces de abastecer o mercado é precisamente en castañero. Tardaremos de 2 a 3 anos en solucionar isto. Concretamente na nosa empresa estamos especializados na producción de castiñeiro híbrido, e en 2 anos estaremos xa en plena producción.*

**Non cres que se en Galiza se realizan recuperacións de terreos degradados, taludes de estradas, etc... con planta autóctona; ou se fixesen plans de recuperación ecolóxica de certas zonas, non con árbores madeirábeis, senón con outras especies que tiveran interese especial, estou pensando nos acívros, teixos, érvedos, sobreiras, especies de ribeira, etc... Cres que teríamos oferta de planta suficiente?**

*Producir érvedos non é ningun problema, reproducimo-los por estaquilla, e podemos ofertar os que o mercado demande a prezos razonábeis. De sobreira, con semente galega sería difícil nestes momentos sacar grandes cantidades, pero con semente do sur poderíamos producir nun ano as que se quizesen. O mesmo nos sucede co carballo (*Quercus robur*), o problema e conseguir semente selecta de aquí de Galiza, e isto si que non é algo que se faga dun dia para outro. Nos países cos que nós temos relación, levan moitos anos traballando nisto, con selección de pés, establecemento de hortos sementeiros...*

**Neste sentido a Xunta ten declarado varios rodais selectos, para producir semente de calidade...**

*Si pero neste momento só hai tres de *Quercus robur*. E os rodais hai que cuidá-los, poñé-los a producir semente en condicions, e os que hai declarados non producen semente dabondo para a demanda que pode haber. Hai pouco*

*vimos de ver hortos de sementes no sur da Franxa de *Pinus pinaster*, e no norte de *Pseudosuga*, e rodais seleccionados de *Quercus Petrae*, etc... e levan moitos anos xa, cunha planificación, con selección de sementes, etc...*

**Por tanto unha vez conseguida a semente non teríades problemas de producción...**


*Non, nós na capacidade de producción planificada de planta e a prezo de mercado, non temos ningún problema. Excepto con castiñeiro híbrido, como antes comentaba.*

**Que método utilizades para reproducir este castiñeiro?**

*Hai tres líneas e nos traballamos as tres: via estaquilla, via acodo, e aclimatación e engorde de planta propagada in vitro; e ainda así temos problemas, non está collido de todo o punto, non sabemos que clons se van certificar, está-se traballando sobre vários clons, etc...*

**En certas zonas, onde non houbo problemas coa tinta, non sería preferible utilizar semente de castiñeiro do país (*Castanea sativa*), en vez dos híbridos?**

*Home, depende para que queiras ese castiñeiro, se o queres para castaña, para madeira... De todos os xeitos, mesmo para producir castaña, interessa-che un porta inxerto clonal (híbrido ou non) onde inserir a variedade que desxes (de cedo, de tarde, que*



*sexa marron ou non...), e nun patrón híbrido hai unha serie de factores que están controlados, cousa que non sucede co *Castanea sativa*, ainda que tamén é certo que sobre este non vai haber problemas de incompatibilidades que poden aparecer sobre patróns híbridos.*

**Através da vosa empresa Boibel, tamén facedes plans de repovoacións, como vedes a demanda da xente cara as reflorestacións con frondosas caducifólias?**

*Ben, nós somos unha empresa específica. Cada empresa ten o seu lugar no mercado, e o noso foi a especialización en frondosas caducifólias. Por isto nas nosas plantacións vai fundamentalmente este tipo de especies, pero isto non quer dizer que o sector sexa iso. Se algúen quere repovoar con carvallos ou castiñeiros, seguramente recurrira a nós, pero isto non é significativo do que sucede no conxunto do sector.*

*Nós facemos uns cantes centos de hectáreas ao ano, que maioritariamente son reforestadas con frondosas caducifólias (carballos, castiñeiros, cerdeiras, nogueiras...). Ainda que tamén plantamos sequoia, e pseudosuga, especies pouco utilizadas no conxunto do sector, en cambio utilizamos pouco *P. radiata*, ou *E. globulus*, pero isto non é significativo do que está sucedendo no conxunto do forestal, non somos para nada representativos, do que nós facemos non podemos sacar conclusións xeralizábeis.*

**Igual sucede co seguinte, nos producimos planta inxertada de árvores froiteiras do país: mazanceiras, pereiras, etc.. isto é representativo do que ocorre no sector? seguro que non, seguro que se venden moitas mais maceiras golden, que tres en rama, comoesa, etc...nas que nós estamos especializados.**

**En Cerna temos constancia da vosa sensibilidade ambiental, mesmo tedes colaborado con ADEGA, na campaña de distribución de Acívros. Como vedes desde a vosa experiencia, o problema da progresiva eucaaliptización do territorio, e a perda progresiva de masas autóctones? Cres que se pode invertir ese proceso e que no futuro haberá mais demanda de caducifólias?**

Nestes momentos hai unha relativa demanda de caducifólias, sendo o maior problema para nós a provisión de semente. Pero claro, cantes eucaliptos se producen ao ano nos viveiros? varios millions, o mesmo de piñeiros, en cambio en castiñeiro ou carballo estamos en varios miles.

Pero o problema non estará na producción dos viveiros, existe todo un sector industrial no noso país que está especializado en usar un tipo de madeiras (eucalipto e piñeiro), iso sen dúbida condiciona as preferencias da xente a hora de facer unha reforestación, que irá cara espécies con saída no mercado e con rendabilidade a curto prazo?

Eu o concepto de curto ou longo prazo, mesmo o concepto de rendabilidade relativizo-o moi sector forestal, todo isto depende de factores políticos, de como se leve a política de subvencions, de desgravacions fiscais. Se mañá se decide que todas as cortas de frondosas caducifólias sometidas a un plan de xestión non incremente a conta de ingresos a declarar a facenda, seguro que iso terá unha resposta favorábel da sociedade e incrementará a rendabilidade das especies de turno de corta maior. Pero ademais temos que ter en conta que os turnos de corta non os marca a especie, marca-os a industria.

Por exemplo, o turno do eucalipto agora está en 12-18 anos, mentres celulosa sigua demandando iso, no momento en que por calquer circunstancia lles deixe de interesar esa especie, automaticamente o turno de corta pasa



a ser de 40 anos. No piñeiro pinaster fai uns anos todos os aserradeiros querian toros de 20cm para arriba, hoxe están en 14cm, por cuestiós tecnolóxicas, por falta de materia prima e porque hai que anualizar os rendementos, mesmo tende-se agora até os 10 cm.

Parece deducir-se do que dis, que para incrementar a rendabilidade das caducifólias, ademais da política de subvencions e de esencions fiscais que comentas, habería que fomentar tamén unha maior diversificación industrial?

Bon, a longo prazo cabe a posibilidade de facer mellora xenética para incrementar a produción, pero tamén cabe a posibilidade de fomentar industrias capaces de aproveitar esos produtos florestais cun ritmo máis rápido,

que é unha via que tamén se está a aplicar ao mundo das frondosas.

Neses sentido, cal é o turno de corta de carvallo, ou castiñeiro? pois depende para que?. Castiñeiro empregados en talladía, ou en cestería, teñen turnos de 7-8 anos. O ameneiro se é para tornear aproveita-se de 7 cm, por tanto ten un turno de 5-6 anos. O que nos marca isto é a industria, a sociedade ten que saber que tipo de política industrial quere aplicar aos seus bosques, por qué cadea de transformación quere apostar. Nestes momentos hai lineas de produción en Suecia, en Finlandia, en Alemania, que precisan caducifólias de 10-14cm de diámetro, cantes anos tarda unha cerdeira en ter esos 14 cm?, ahí tés o seu turno de corta.

E realmente moi interesante esta conversa con Xavier Viña, interesante e esperanzadora para os que sempre defendimos as posibilidades produtivas das nosas especies caducifólias, para os que ainda esperamos ver algun dia no noso país, bosques de carballos, de castañeiros, de cerdeiras, de nogueiras, de bideiros,... xestionados racionalmente polos seus donos e dos que obteñan proveito, e que as múltiples vantaxes ecolóxicas e económicas revirtan tamén nunha mellor calidade de vida para todos.

Con esa esperanza deixamos as terras de Frades, onde o viveiro Argoat se asenta, e deixamos aberta para outra ocasión a posibilidade dunha reportaxe mais pormenorizada sobre as liñas de produción desta empresa e dos seus planos de futuro.

#### TENDAS COMERCIO XUSTO

As tendas de Comercio Xusto creen nun comercio no que as PESSOAS somos o primeiro, en potenciar organizacions que nos liberan (ós de aquí e ós de alá) das estructuras de EXPLORACIÓN imperantes, en que os productos crean LAZOS entre os productores, os distribuidores e os consumidores.

Nelas podes atopar CAFÉ de 1ª calidad pagado ás cooperativas nunha cantidade bastante superior á do mercado e a un prezo final similar ó actual, ARTESANÍA de cestería feita por nenos de Filipinas sacados da prostitución, VELAS de Soweto e que se comezaron a facer no tempo do Apartheid, papel reciclado, ROUPA de cooperativas guatemaltecas, bolsas de iute elaboradas en hospitais de Bangladesh, unha biblioteca especializada en temas sociais, económicos, pedagóxicos e moitas más cousas. Moita más información en:

#### A COVA DA TERRA

R/ San Pedro, 13  
Galerías Novocentro  
Telf. (982) 23 02 11

#### ARAO

R/ Elduayen, 8  
Telf. (986) 48 63 42  
VIGO

#### PANXEA

R/ Rosalía de Castro, 29 - 31  
Galerías Belén, L 109  
Telf. (981) 53 10 88  
COMPOSTELA